



鈴山堂集序



鈴山堂集集少傅介谿嚴公所著爲文者也公嘗曰先民有言志士惜時吾少固多疾憂然六籍之文不敢後也揆政應物往往發而爲文故作書且滿笥要未能極吾所欲言若夫殫忠事國之義亦畧盡於此覽者其或有諒吾之志也已治嘗侍於公聞而嘆曰夫文者人之英華也山川之靈實權輿之矣宜春郡之東鈴山在焉其竒

秀璠合異靈鳩毓固東南瓌雄選區也在
昔楊文貞公實生于郡之鳳臺而少傅公
今復崛起乎其間俱以弱齡神悟揚休禁
林終陟元輔而文名著盛一代相炳映也
其大都同若此豈非山川之靈全畀而駿
發之與何騰凌竄絕橫亘而莫之京哉治
嘗讀少傅公之文觀其權古苞道劑事摛
藻無不合作者及輔

今上入而護保

聖躬出圖議庶政日不暇矣顧其文益工鋪
陳帝業經制人文祇應

明命陳說化理咸中典則雖震衝盤結事匪
故常罔不取裁衷臆油然有餘力也其聲
鬱律而不怵其出泔淡而有餘若斯者由
神情之定乎太史公曰不先定其神而曰
我有以治天下何由哉神定矣其聲出鬱
律而端泔淡而不窮不期然者耶故以予
觀于公之文則其神可知矣夫神者所以

強立萬事也今天下事若有紛綸歲蕤蹠
鑿瘡痍渙漫不起者非夫明作振理安所
不蹶耶公之在相位也因變循形煦育噓
蒸埏于無端攻于無名而協中以為極至
若鎮定撼擊解紆紛錯調劑燥濕茹納闇
黷其獨運之智蓋有人不及知而公亦不
自以為言卒之狂譟者息紛亂者止而翕
然大同

今上厲精之化加乎百王者非公所神明之
其何能臻茲哉是故文章德業二者其神
相用也伊訓說命金縢立政諸篇猶之乎
文耳而翊戴商周之業格于皇天者亦不
出此夫公之蓋勞休功施之

宗社被之天下流聲乎無窮固有不俟于文
者然而茲集也其大足以定國是賁王猷
聲歌所發亦足杼軸天人經緯風雅百代
之下考德業者徵焉將不流今而傳後哉
嘗觀古之相天下以文著見者寡矣其以

文名者類皆困窮拂鬱濩落而無所庸焉
豈文章德業不能相有耶抑所際合者之
難耶公於

今上君臣之間志道孚合謀猷符契得失不
能疑其心讒構不能離其交夫然後能兼
美二者而大焉是豈徒人事哉將必有爲
之權輿者矣詩曰維岳降神生甫及申山
川之謂也集以鈐山名觀者能不有感于
斯乎集凡三十有二卷賦頌若干篇五七

言古體詩若干篇五七言律絕句若干篇
序記碑志若干篇內制及講章若干篇南
宮奏議三十卷歷官表奏十卷亦類附焉
刻在乙巳之歲

嘉靖乙巳三月之望

嘉議大夫吏部左侍郎兼翰林院學士

會典副總裁兼修

玉牒茶陵張治拜撰

鈴山堂集序

浚川子曰君子修辭要在訓述道德經理人紀垂示政典尚也必品格古則而後文之美備故曰理勝則傳又曰言之不文行之不遠予讀大宗伯介谿嚴先生之集見其詩思冲邃閑遠在孟襄陽伯仲之間文致明潤宛潔揆之歐陽子稍益之奇未嘗不歎服其體格古雅而卒澤於道德之會也雖然此自其文體擬論之爾予嘗謂君

子之文根諸德性學術之造詣者深乎極
矣苟於是二者有歎雖其才智足以立言
不蕩於淫靡則芥於蕪穢不刻於佻巧則
痼於淺率不迂於事情則迷於時宜不惟
無以考德論學以之敷政軌物亦無所於
達矣是故君子病之今觀鈴山之集辭旨
冲淡者則知先生之純素雅則者則知先
生之正直簡嚴者則知先生之整肅溫潤
而韞蓄者則知先生敦大而渾厚朗練而

有劑量者則知先生炳於幾先而時措嗟
乎茲於道於治其庶幾矣夫安得而不傳
使遺之後來必卓爲世模倘代夫王言必
有光綸緯此予之竊覩於先生者也世之
君子當有契於予言

嘉靖十二年歲在癸巳五月庚戌

資政大夫南京兵部尚書奉

勅叅贊機務儀封王廷相序

予每遇誦介谿宗伯詩輒興歎曰泊乎希

金山堂集 卷之六
乎而古之遺音焉然僅一二也而今得鈐
山堂集乃詩若文咸備窮日之力且誦且
歎而弗能已於言聞崆峒子評介谿詩曰
淡石潭翁又曰達達者其詞和淡者其詞
平夫和平而後謂之至也大圭不琢琢則
理紊大羹不調調則味漓上古之文而洋
洋而噩噩而優柔平中其大圭大羹之存
乎自夫騷工墨匠矜竒角巧僞以利朴澆
以漓醇浮以蝕雅缺然希聲之不復作也

幸而有和平之音其於古作者之志則幾
矣是集也玄不崇虛深不探冥博不闢靡
竒不衒怪變不習誕葩不離實密不繁節
健不耀鋌思冲冲爾情熙熙爾風融融爾
氣灑灑爾光淵淵爾正猶廣座之中呼者
呶者譟者號者奮袂並起撫而止之而從
容以言旣和且平則呼呶譟號咸失其音
矣夫行空谷聞人足音猶愕而喜况油然
而聞古之遺音乎予固于是而三復焉

嘉靖辛卯仲秋既望

資善大夫兵部尚書兼都察院右都御史
蘭谿唐龍序

鈴山堂何宗伯嚴公里居也集何公製也
錄公製表公里居何重公也劉子序曰美
哉製乎泯泯乎聲哉雍雍乎度哉燁燁乎
文哉鋪采摛繪麗詞與旨楚漢之遺軌也
宣志理情和聲昭則魏晉之遺音也詮詞
命意闡道倡義陳時類事披悃繹素絕塵

唐宋振響周秦者也允哉詞苑之鴻裁藝
林之懿範矣夫追之琢之文之至者也金
之玉之質之至者也公靈含玄悟邃詣精
蘊純粹冲和妙厥致矣是故發爲藻華抽
運妍巧播之篇簡超契冥贖胡言弗燦胡
辭弗章是故神馳八極心遊萬仞經經緯
傳馳古驟今謝已披之朝華啓未振之夕
秀而流被無窮辟之金追而玉琢之非文
之至者哉吁美哉製乎深其造矣

金山堂
嘉靖壬辰冬十二月朔

通議大夫刑部右侍郎大庾劉節序

緒從大宗伯介谿嚴公燕暇出示鈴山堂
集稍讀一過曰盛哉公之文也庶幾時弊
不入歟蓋古之爲文者其大先於言行之
實其次則在事物之情方其時制度定禮
義則聲教明風俗同而道德一故其文精
實簡確醇厚含蓄平易明白使千載之下
讀之猶足興起雖至閭巷婦女田野鄙夫

出言成章亦非後世學士大夫之能及其
存於載籍詩書間者皆可見也或有聱牙
佶屈如三盤十誥者乃當時榜示因其方
言使之易曉其後史官節畧有若此者豈
爲文之體固如是也蓋今之爲文者不本
言行之實不求事物之情功利是謀得失
是計尚模擬者其辭誕騁私意者其辭昧
徇俗好者其辭亂務竒怪者其辭艱崇組
繪者其辭靡惟誕故虛泛而無實惟昧故

是非失其真惟亂故流蕩而莫歸惟艱故
蹇塞而無用惟靡故淫侈而寡要所以叛
道失經誣世病國為生民害而莫之已也
公以清明俊朗之才加以研精韞積之深
故其文之峻潔簡練豐腴委曲則嘗師法
韓歐故其詩之冲淡沉婉清新雋永則嘗
出入盛唐諸家力去近習成一家言君子
固稱之綰亦何云且公負廟堂重望遭逢
聖明以文敷治行當入贊

皇猷陶鎔天下之士而滌濯之其為斯文之
慶何如綰劣不足知公幸嘗辱教故書綴
集末以俟

嘉靖癸巳夏至前二日

通議大夫南京禮部右侍郎黃綰序

論者曰天之將達是人也先屈之其將亨
是人也先困之君子之自處不然達矣而
其未周復屈可也亨矣而中未實復困可
也夫江避礙於三峽而永河洄流於九曲

而廣君子之修也挈於心以協之天下鑑
之古以參之斯世去其所不可不去存其
所不可不存則其發爲功煥爲文動四方
而垂千禩矣太保大宗伯分宜嚴公踰冠
舉進士上第讀書中祕試常冠吾曹自故
相李文正而下咸偉其才已直史館穹秩
可以契致而公歸棲鈴山之下結茅植椶
耽書履素櫝簪弁而冠鶻閑甘脆而茹糲
杼思樂潛爲詩若干首銑誦之曰清婉而

綺不浮其質斯肥於山林者乎居十餘年
應召還館已使粵藩掌留院教國子貳吏
禮之卿遂長南曹如其貳者焉道路所經
官常所激僚友是酬爲詩若干首感喻乎
交際訓敕乎生徒敷納乎治理爲文若干
篇銑誦之曰辨于禮裁而藻思緻循乎典
常而玄倪寓詩其唐之春容文其漢之簡
健斯施諸廟堂者乎今

聖皇在位修正禮樂詢咨文儒公被 知遇

股肱攸屬

聖心之所創作羣僚之所建白畸士遠臣之所條上公隨方而應執矩以裁可可否否允稱

德意蕃錫累諭騰章奏謝將續梓之孟子謂造道資深然後左右逢其原亶哉銑考古之君興緒植業隨材而授若夫禮樂必俟儒者蓋分合天人知徹幽明體兼述作敬貫清直一革一因上造下循或張或弛善

登僻止故曰明乎郊社禘嘗者治國其如示掌於戲公之文之用至是而大矣哉

嘉靖己亥孟秋日

中順大夫詹事府少詹事兼翰林院侍讀學士安陽崔銑序

鈴山堂詩序

詩三百凡各道其心之所欲言而已耳無定體也詩有體後世泥古而忘已性情者爲之也泥古則困頓規矩而於辭有不達

忘己性情則淫靡趨向而於心有不盡楚
騷不必泥風雅漢魏諸選不必泥騷唐宋
李杜蘇黃諸律不必泥選縱橫高下各自
成家讀之可興可觀可群可怨心聲之發
所以同于人也何害其體之不同今歲首
夏嚴太史介谿先生過臨江出示鈐岡詩
一帙偉携入山中績讀一載見其格致高
古韻度深遠畧無齊梁以下光景及近時
膚脆之習疑其有從入手處而氣機圓轉

精彩華妙徃徃自見於繩法之外有非前
人漂沫所沾泥蓋自漢魏以來作者門戶
闕闖已熟而思以奮自起立別爲一體者
鈐岡山名先生所居近之景趣擅一邑之
竒旦暮遊息其間芳潤熏漱有不知其意
與境會言笑成聲者矣夫是雖作者亦已
忘言也偉非作者安知夫言之有得哉管
倚行墨之下時見一斑終非所以論先生
也雖然至治之聲也終當出鳴大和以備

金
山
堂
集
一
月
三
一
一代之雅鈴岡林澗豈得專夫金膏水碧
之玩也哉

正德乙亥冬十一月十日

中順大夫鶴慶知府前工部郎中鷺沙孫
偉序

鈴山堂集總目

卷一

賦

卷二

詩

卷三

詩

卷四

詩

卷五

詩

卷六

詩

卷七

詩

卷八

詩

卷九

詩

卷十

詩
卷十一

詩

卷十二

詩

卷十三

詩

卷十四

詩

卷十五

詩

卷十六

詩

卷十七

詩

卷十八

頌

卷十九

序

卷二十

序

卷二十一

序

碑

卷二十二

記

卷二十三

記

卷二十四

內制

講章

卷二十五

講章直解

卷二十六

雜著

卷二十七

雜記

卷二十八

神道碑銘

誌銘

卷二十九

誌銘

卷三十

誌銘

卷三十一

誌銘

卷三十二

誌銘

傳

鈴山堂集總目

鈴山堂集卷第一目錄

賦

祇役賦

景雲賦

恭和

聖製奉

聖母舟行賦

嘉禾賦

橫山賦

鈐山堂集卷第一

賦

祗役賦

上纂祚之七年余承乏禮卿之佐祗役 顯陵發自
國門馳燕趙之郊遵衛涉漳經鄴城踰大河而南趨
襄鄧以入于郢周爰咨諏有懷靡及延覽古跡慨然
遐慕爰敘行歷而作賦焉其辭曰

歲屬著雍日離鷄次 皇帝升法官御宸扆有詔若
曰朕賴 先德獲纂天序卷惟 顯園越在郢里霜
雨悲懷靡遑寧止爰飭崇儀備典昭祀咨爾禮臣其

往予使於是臣拜稽首對揚 王休承 皇命于當
 宁兮備大使於 山陵 寶冊授以燕賜兮資金幣
 之爛盈引閣門而陛辭兮戒祖道而南征爾乃抗節
 都亭騰符赤縣臺省徵言公卿張餞盱斂物以舍郊
 兮周禮雜帛為物大夫建物儀禮舍于郊 夙展載而
 趨傳涉漯河之修梁兮窺黃流之奔駭 盧溝橋河名
 小黃河其流濁也 洄桑乾之經恒兮合衛河而赴海
 漯源出西山桑乾山經太行山入橋至直沽與衛河
 合而入海 顧天府之都會兮歸堂陛之雄塏 蘇秦謂
 燕天府之國寰宇記云一大都會梁襄云地處雄要

北倚山險南壓區夏若坐堂陛范鎮賦博大爽塏食

中都之息足兮眺廣陽之故績中都春秋時名有廣

陽故城今良鄉縣 心遲遲而有違兮還慕瞻乎京邑

簡書畏而遑處兮駢周道其焉廢日履上谷而慕

楊盧兮路厥鄉而起式 上谷秦郡名今涿州楊震涿

守盧植涿人 晝余芟于宥戒兮戒音戒五代鎮名今

安肅 脩保定之夕屆誦橫翠之雄賦兮信控扼之險

隘劉因作橫翠樓賦 自秦漢而為鉅鹿兮底五代而

歸胡界中國望兮吐蕃宋陵悲兮虛塊 劉因賦控鴈

門之右塞引雉距之清流倚太行之宕觀接易水之

長洲秦為上谷鉅鹿二郡五代割屬契丹宋欽陵慶陵安陵在焉隋山路之昧塞兮橫唐河乎倒馬唐河在唐縣西十三里倒馬關名從葛洪與太一兮紛合沓而屏野葛洪太一皆山名關西南層巒疊嶂此特其高者猗堂閱古之若新兮並不敞于嘉山美名卿之偉略兮炳圖籍之班班嘉山定州山名閱古堂韓魏公帥州時建繪古今名賢事于壁閱恒山之隩區兮嘆樂武子之霸烈嗟李牧之將才兮迺信讒而取滅真定漢恒山郡浩滹沱冶河合兮緮金隄其隄元史滹沱河本微與冶河不相通後二水合其流始

猛屢壞金大堤為患何湍悍而遽冰兮信王命論之非惑光武兵至河視冰合遽渡伊倉卒具乎麥飯兮乃名亭而載德馮異為光武具麥飯于此有麥飯亭葺趙州其作國兮停余車其興思何虎狼之強敵兮獨持壁而完歸示死國之有人兮陰折衝而申威視却霸之賈環兮厥勢難而功奇彼以亶父例責兮惡知乎立國之權機趙州古趙國晉韓起聘鄭欲賈鄭商人環子產不許曰恐為晉鄙也楊龜山以大王事狄責完壁之過萃大行雄鎮邢臺兮漳水汨其帶紫順德府為古邢國登叢臺以惆悵兮感蔓草兮流塵

當妖曼之悅陳兮豈識夫異代之悲辛邯鄲叢臺趙
王歌舞地聞漳河其總余纒兮俯清濁之異同驚纒
纒其家連兮迺知曹計之云窮漳河二源出山西曰

濁漳出平定曰清漳俱入衛河道旁有曹操疑冢七

十三處厲猛氣之飄疾兮窺神器乎梟雄苟有愧將

焉逃兮藏天下其疇証唾偽迹而驅馬兮突古姜里

之城屹彰德姜里城文王演易處盡忠誠以蕩蕩兮

遺厥難焉而彖易發天秘以開人兮俾三綱九法乎

無斃卒化德以悔悟兮畀伯鈺以謝失何史臣之厚

誣兮仗閔散以賂釋偉湯陰之正氣兮孕精忠之武

穆憤二聖之莫反兮指朱仙而奮轂使金牌之不出

兮豈唯故置之能復何宋帝之遺親兮使吾人顛天

而莫贖卒英烈耿天地兮忤奸人兮世戮岳武穆湯

陰人怵淇衛之降災兮悅殷憂而歛歛火朝覲而道

第兮野彌蝗而墾藝無列樹與川梁兮塗積醜而忍

視是歲衛輝以南皆旱災俠繪狀以陳圖兮黜發粟

而矯制爰觸目而惕中兮徒慙乎古之為使濟榮澤

而南逝兮越洪河之浩渺陽侯怒而天吳號兮羗禡

魄而震掉蓋五千里而達中土兮踰九折而出西徼

非都實其疇窮兮靡昂霄其焉考都實元人窮河源

後翰林學士潘昂霄得其說為河源志世言河九折
彼地有二折蓋乞兒馬出反必赤里也陟鄭郭而躋

丘墳兮想裴相之平淮唯廟堂之成斷兮知人善任
而無猜何彥章之忠勇兮惟金虎而功墮若子皮之
授政兮更千古而微儕裴度平淮西時駐節於鄭州

西門和義橋後人立祠於此王彥章為後梁鄭州防
禦使將戰馬踏被唐莊宗擒不屈死葬此歐公為記

鄭子皮知子產賢授之政曰虎師以聽誰敢犯子朝

發軔乎新鄭兮應國御而告曠葉縣古應子國嘉二
水之渙渙兮濟余輿於溱洧之潯閱歷孰匪古事兮

心賞貴於所欽登高丘而眺昆陽兮髮毛豎而魂慄

想漢兵之決戰兮犯初鋒於尋邑虎豹象羆其咆哮

兮猛士雲屯而川溢眷炎昨之載興兮豈僭竊之能

敵南陽也古稱南都倏岡斷而盤回兮隱卧龍之故廬

起自嵩山綿亘數百里至南陽而止回旋如巢然諸

葛亮草廬在焉想疆理之區畫兮咸分鼎之弘圖感

三顧而一出兮果靡言而不符城南潁而曰樊兮峙

荆襄之屏翰義雲長之困仁兮慨英富之死戰關羽

圍曹仁於此張弘範攻樊城曰襄在江南樊在江北

樊破則襄亦下以舟師截江銳師薄樊城城陷漢英
 死焉牛富率死士巷戰進遇民居燒絕街道赴火死
 振吾纓而斯濯兮鑿清漢之泚泚源蟠冢而入江兮
 會沮泌之諸流漢水源出隴西蟠冢山由漢中流經
 均州光化襄陽東南至宜城大別山入江臨山南之
 層觀兮造襄土而停輶襄陽郡治有山東南道樓唐
 李陽冰篆南觀羣山北望中原為一郡之勝美哉邈
 乎茲土之舊也挾巨浸以為池面崇山以為郭鬼峴
 岡而橫亘沛檀溪以邪絡跨益棘而徹梁洋兮極湖
 湘而控宛豫曹操嘆為金城兮司馬謂為要地曹操

過白馬山嘆金城千里魏司馬懿云禦寇要地鎮有
 祐而歸心兮羊祐士得依而倍氣陶侃虞議定而鄧

完兮虞允文岳志決而金避岳飛城東南之根本兮
 何宋人之失計今古同於一嘍兮撫長川而嘆逝釋
 余馬于宜城北兮斯惟善謔之古驛彼放鵠而揭籠
 兮雖辯士而於國益宜城縣北二十里古善謔驛今

名潼口驛有淳于髡墓在驛即髡放鵠之所於是商

秋肅節玄雲霈陰涼風凄其薄體濛雨鬱兮下零眷
 庭楸之墜葉兮感賓鴈之遺音未境入而墳壇兮在
 畫堦而北帷不假宮而布幕兮式三展而登輿儀禮

使者及境畫地為階惟其北不為宮布幕展習其禮
 邦郊近而物張兮候人辟為前驅修閭帥而追胥兮
 野廬環而守涂授館致餼官正涖事司事至而請期
 余乃沐薰而戒具笳吹雷動部乘雲屯嚴鼓載奏冠
 裳駿奔庭燎炎晰而燭天簫管軒磕而聳山曳雲梢
 而拂電樹虹旃而隱巒華翟奕奕清瑟雍雍春醴維
 醇燔炙亦從陳殷薦于寢廟兮上微稱于主
 寶冊讀而帛焚兮易宮懸而萬舞拓園陵之舊
 觀兮飾宮寢之新度侔崇侈于天壽兮效大亨于
 皇祖于斯時也屬工役課章程百伎呈材大功以

成鬱翬飛以鳥革峭繩直以準平差我嵬嶷猗靡隱
 嶙邈侯王而特出譎帝藏而鴻紛據坤靈之傑勢承
 蒼昊之精殷苞陰陽之神化含元混之網媪甘露被
 于楸櫞玄醴涌於唐陳朱桂翁鬱于平城蘭芝鼓祥
 風而激芬禺強扶其左右禺強北方神名堪坯呵其
 域局堪坯太山神名永安固以祉福為社稷之基
 寧爾迺登白雪兮激皇琴撫陽春兮動虞賡訪解珮
 之浦尋聊屈之岑訊五龍之堰沿龍鳳之溥盤踞聳
 觀汚隆測景浮漢江兮連漑泗阻石城兮臨京嶺嗟
 乎偉哉夫此郢方兮在春秋而虎視兮霸齊晉而莫

制在戰國而爭帝兮強如秦而亦辟光武以之復漢
 兮春陵為之啓瑞諸葛躍馬而興蜀兮呂陸揚英而
 顯譽東晉倚之為強兮梁人憑之易氏自時厥後匪
 一春秋遂為偏方降為下州山川雄氣停凝憤盈一
 旦發世傑出 真人續往聖之綫緒兮復中古之隆
 平藐余生之何幸兮亨運還而陽長赤余衷而見揆
 兮簡駿命而弘獎布几筵而實來兮懼委命兮草莽
 竭愚誠以效職兮庶副 孝思乎深望諄曰赫赫中
 興弘我 明兮不顯惟德極尊親兮頌是大物萬古
 程兮監此四國求民之瘼兮仁以為理兮敷天以慰

兮臣職庶靡悔兮

楊慎曰此賦似潘岳西征之工而無其繁蕪之病

景雲賦 有序

聖天子即位十有七載明飭庶治協和兆民既正
 郊祀既崇 廟祀廼稽古禮發綸音尊 嚴父以配
 帝開明堂而大享歲在戊戌月惟季秋百物告成
 報禮斯舉先三日己丑日正午天宇澄霽有五色雲
 氣抱日光采絢爛熠燿如綺臣民瞻呼久之不思考
 諸載籍若煙非煙若雲非雲郁郁紛紛蕭索輪囷是
 謂慶雲亦曰景雲此喜氣也太平之應援神契曰天
 子孝則景雲出遊信斯言也允符今日之徵况自虞

金華集卷一
廷歌罷官紀不述者閱三千年于茲矣恭惟 聖上
夙秉純孝肇興曠儀方當庀事之期即協天心之豫
明德達於惟馨靈符昭乎有象式美虞黃之化維新
河洛之章臣嵩忝備禮官恭承盛事謹撰景雲賦一
首奉紀殊祥竊附於古詩人頌德陳事之義賦曰
於 明后之御天兮儼穹窿而下親昭景雲以垂象
兮光煜郁而紛繽初網緼其射采兮倏蓬勃以景煥
恍騰龍以擢形兮若翔鸞之擒翰既霏廓而氛澄兮
亦葩蔚而柯散俄捧日以昭回兮歛繞空而粲爛非
煙霧其曷類兮苞五色而融成映臺觀而掩鬱兮獨

光絢乎紫庭衆叩首以駭目兮感熙事之無前載閱
墳籍其何祥兮乃孝德純至而格天玉燭輝爍以磅
礪兮光華亘乎九埏彰聖化之洪龐兮昭文命於萬
年惟 郊祀暨 廟享兮秩百禮而率舉羗明堂之
未備兮 聖心鬱而未遂物阜成而曷報兮荷生成
其執主 皇考淵德以啓 聖兮上巍巍而爲伍盍
我將而我享兮父 昊天其來子爰卜吉而告虔兮
神髣髴而延佇倏嘉悅以生色兮舒雲章而爲祥默
無言而示兆兮旌帝德之輝光昔帝堯之沉璧兮感
斯端之昭格虞陳祐以作歌兮亶榮光之四塞黃合

金山堂集 卷一 賦
宮之初構兮亦發祥而彰德猗我 后之聖神兮軼
遐軌於百王聿崇禮之肇稱兮紛來籍乎殊祥粵昔
事 帝園丘兮垂寶露之穰穰何先後之一揆兮信
感通之不爽也歌曰倬彼景雲龍之翔兮熒熒煌煌
爛天章兮天心寵嘉 聖孝備兮 聖德廣運望如
雲兮臨照四方光八表兮於萬斯年旦復旦兮

恭和 聖製初夏奉 聖母舟行賦

嘉靖丁酉孟夏初吉 皇上有事 山陵既乃駐蹕
金山奉 聖母章聖皇太后御龍舟汎于西湖享至
養以尊安屆昌辰而娛侍於是 上親灑宸翰製古

賦一首從官詞臣咸踊躍忭蹈而恭和焉嵩謹賦曰
踰國門而西駕兮歷岡阜之表長屆迎夏之九辰兮
協帝德之盛陽金山矗而佳麗兮巨浸匯以汪洋御
龍舟而臨汎兮震鏡吹之嚶嚶牙檣耀日以聯集兮
羽葆承風而飄揚惟 皇大孝隆至養以奉 慈懼
兮豈汾遊之可方凌浩渺而遡空明兮俯雲影於天
光慶四海之寧謐兮民熙物阜嘉股肱之得人兮主
聖臣良冠百王以首出兮咸一德而允臧乃 聖心
猶惓惓兮粵稽古而圖治灑宸翰之謙冲兮同堯舜
儆戒之弗忘仰 聖神之廣運兮配天罔間期懋敬

於無斃兮皇國是匡
諄曰四月維夏景物嘉兮爰奉
慈顏悅且康兮法祖用賢懋治功兮乃賡載歌
以永傳于來世兮

嘉禾賦

有序

皇上至德格于三靈嘉祥應于嗣歲乃甲辰秋八月
帝苑之田穀生一本雙穗計六十四本臣嵩獲奉命
同諸臣觀之同本異岐厥穗挺出厥實駢垂誠希世
之上瑞也蓋閱歲而再見焉倚歎休哉謹拜稽首而
述賦曰

維聖皇之御極兮恒志存乎四方念民食之維寶

兮祈上天之降康猗精運而誠感兮肆受祐于我將
迺嘉禾之蕤蕤兮俟帝畝以呈祥曰一本而雙穗兮
何生殖之異常矧數擬於八八兮備羲畫之陰陽將
神明之樹藝兮抑方宿之垂芒迎金風而薦實兮浥
玉露以含芳慶豐穰于農扈兮擬倉廩于茨梁豈周
禾之足稱兮匪漢麥之可方知太和之攸萃兮表至
眷于玄蒼重曰惟聖至仁撫四方兮一德升聞格
九光兮雨暘均調地獻祥兮嘉禾丕生徵百昌兮神
人胥慶樂且康兮惟聖萬壽福無疆兮

橫山賦

金山堂集 卷一
吳之東南有山曰橫山者州之望也山有五塢境號
幽邃盧子師陳構室居之盧子名繫仕籍而志隱巖
石予乃爲辭以慰喻之云

伊橫山之神秀奠吳會之奧區轟巖巒之合沓渺林
岫之縈紆石湖南阻震澤東望澄景泓渟層波迴瀆
哀猿吟兮翠屏白鳥宿兮煙浪樹嵒粲以樛枝石磴
礧而成象標五塢而得名乃瑰迹而殊狀爰有飛流
懸瀑滅瀨澗淙界青壑而成簾霈銀河而瀉空八樹
灌生馥醇菁葱鳳翎連娟擢修竹車蓋偃蹇團喬松
至若朱霞曜岡白雲繚嶺蒙曦暎之丹氣暖皓灑之

素景雖赤城兮鑪峯曾不足喻乎茲境故方輿紀圖
僊隱遺蹟羽士侈宮禪伯留錫抗宇崇薨明壁洞室
或憑崖竦之清峭或翳篁椽之蒙密粵稽馬雲宋代
之賢登憇茲山樂而賦焉攄英詞於篇翰寄妙賞於
風煙地得人而逾勝迹因文而迺宣曠之千祀乃屬
盧子吐蕙含珉凝章挺思結雲松之高盟攬薜荔之
頽址爾乃決榴翳披蒙茸疏芳泚掇幽叢遵歲修之
往躅肇營考於新宮專一壑之特勝翕衆美之來宗
苔軒貯月蘿幌留風林窅窅兮可以觀妙雲溶溶兮
爲之盪智窺墳素兮長圍振荷衣兮遙峯及夫金門

薦書華省造屬繡裸瓊裾文茵丹轂掄材江介賦政
關澳志與事以時違俗嬰情而相逐睠望故岑怒焉
勞心結思蘅若軫懷谿林驚帳蕙之夜鶴變園柳之
春禽撫絲桐而獨和倚尊酒而孤斟折瑤草而自惜
乃獨以寄夫徽音乃謠曰湖上山兮瀾白雲湖洲草
兮春復春臨滄流兮弄明月攀玉樹兮懷佳人嗟夫
寓形宇內殊族萬科志士弘濟達人寤歌耦耕沮溺
環轍丘軻慨流坎之靡形貴所立之弗磨履貞信以
爲途庶吾行之無頗

鈴山堂集卷第一

鈴山堂集卷第二目錄

詩

雪霽登鈴山

登郡城南樓見仰山遲遊侶

覽遊大仰山宿東谿方丈

仰山置酒

大仰寺

仰山尋鄭谷書堂

謁古廟

出仰山

過長陂

阻雨不得登蟠龍

途中晴

山塘

蒙山石門梁孟敬先生隱處

仰天岡

泛舟

鈴閣對雨

鍾山遊眺

鈴閣秋集

登宜春臺

東溪晴泛

江臯

郊行

洞靈觀

東堂新成

賜告

晨起

春日

讀易

感述

有喜致醉

春曉歌

夜讌歌

乙亥年雪

霰

伐園中木

雨後南池

夏日間居

對雨

秋夕間居對雨

郊園

觀雨作

齋中讀書

望鈴山

觀馮式實禹鈞事述詠

月夕黎君見尋

中丞劉公盧洲宴集

江館聞雨

宿鴈洲

金山堂集 卷之五
登高值雨留山舍

集劉大別業

喜友人至

中秋陳大叅分司同楊太僕宴

秋夕東堂同傅館長兄宿

鈴閣同劉子集咏

應和見尋

將赴京作

將赴京登郡城春臺作

登春臺貽錢別駕

對雪贈客

答符子

鈴山堂集卷第二

詩前蒙

鷺沙孫偉

升菴楊慎評點

雪霽登鈴山

千峰積瑤素寰宇映空明
仙人好赤脚獨躡層冰行
疊石疑瓊島高樓思玉京
勁風仍振木朗月已輝城
永夜山中宿山泉松澗鳴

孫曰句句欲活神爽飛越

登郡城南樓見仰山遲遊侶

樓壓春城迴山連曉霧寒
身高百林上興遶一峰端

盤踞開雄鎮登臨聳鉅觀所歡猶未至惆悵凭欄干
覽遊大仰山宿東谿方丈

夙駕踰城廓決策戒行遊良朋欣屢集積潦况初收

鳴鳥盈芳甸揚曰二句似章嘉樹蔽層丘覽籍眷名蹟茲焉獲所求

披榛陟危磴拂石漱寒流暝投東谿宿密竹僧廬幽

松嶺露微月蒼蒼烟露浮

城中望靈山縹緲隔雲霧沿廻至山麓山形始呈露

大仰摩青穹鳥道不可度鄧仙與木平俱峰名隱若森

拱護嵐烟迷近遠明雷變朝暮伊余猿鶴姿探賞愜

幽悵巖巒紛合沓一步屢回顧徘徊青蓮宇延竚古

松路緣葛或蹇崖飛泉亦當戶永念區中人疇能息
塵務

仰山置酒

春遊入古寺息駕在山阿不飲杯中物其如山色何
泉聲間鐘磬草色上烟蘿向夕嵐霏起諸峯猿嘯多

孫曰屬辭景中遊情
言外介溪性性如是

大仰寺

珠林勝境隔人寰古樹高花隱石關流水聲中一犬
吠白雲深處數僧閒龍潭路黑烟常覆螭首碑荒字
已斑明日驅車入城去却從塵裏望山間

金山堂集 卷二
仰山尋鄭谷書堂

遺墟那復辯巖石但蒼莽遐想嘉遯年雲霞結真想
餘輝賁草木秀句在穹壤泠泠韶濩音千秋寧絕響
謁古廟二首

緣迴數里道盤互百重山攀林與不極沿流趣自閒
雲度肩輿裏花明叢竹間神宮藏閭寂龍井鎖潺湲
時見林中侶相攜採蕨還

茲山饒靈異古廟極巍崇下有千尺潭深黑蟠蛟龍
興雲雨曠歲闔境歌神功神功既莫測民祀當無窮

出仰山

逶迤遵石磴悵望別雲松老僧不出戶齋閣自鳴鐘
鐘聲在山間客子出山去細雨濕春衣新寒入高樹
此中風景斷塵凡回看翠壑鎖烟嵐劉郎不記來時
路千樹桃花隔水南

楊曰典致酒
洒是謂合作

過長陂

長陂鳥鳴初日暄遊子度嶺窮攀援行尋歇馬

廟名

訪新廟望近蟠龍

村名

識古村春深尚喜林花盛雨

後忽驚溪水渾野老相邀具雞黍解鞍時復過柴門

語意渾然
又在工巧之上

阻雨不得登蟠龍

溪上風雨來颭颭篁竹亂油雲翳層峰對面隔霄漢

景出即了真作家

鳥道紆百盤龍門在天半佳期恨緬邈寒望增凄斷

下馬憇林居一顧屢長嘆自無飛仙術安得凌絕觀

山半有龍門關

途中晴

山遊苦奔峭會意樂有餘大仰尋真隱蟠龍迴我車

濕雲收絕壁高柳媚清渠陂岸生新水期來坐釣魚

山塘

山塘深且廣邈迤抱山麓隔浦見人家依依桑柘綠

日落烟水寒遶塘飛屬玉

孫曰幽勝之景閒澹之趣天然自見不待洗鍊楊曰

六句詩惟唐韋應物劉文房最佳此得其三昧

蒙山石門梁孟敬先生隱處

東蒙擅竒秀萬仞削蒼壁陰崖闕浮雲暘谷曜初日

遙思石門叟長歌倚巖室歲遠跡已陳春草綠如積

情屬不淺亦不能辭

仰天岡

石磴盤秋蘿危亭出峰樹行人上山道望望雲飛處

洞口晚鐘聲林僧獨歸去

泛舟

泛舟無俗情水送復山迎江色迷朝靄松陰轉午晴

金山堂集 卷二詩
穩依危石纜深傍綠蕪行吾已忘機事沙鷗莫漫驚
鈴閣對雨

白霧湧巖扉迴颺吹客衣萬松鳴雨急孤閣到人稀
眺迴迷前浦憑高失翠微惜春今已晚虛負採山薇

鍾山遊眺

可憐春岸飛鷗鳥又見春山長薜蘿峰勢插江路
小峽門橫石水聲多平沙覓句看雲立極浦迴舟載
酒過見說此溪多釣伴月明來聽扣舷歌趣在實境可愛

鈴閣秋集

鈴岡高樓足大觀况逢晴日倚欄干竹林啼鳥關幽關字好

事石磴松風生晝寒病身自喜逢秋健攜手聊尋盡
日歡萬事浮生空役役擬從山客借蒲團

登宜春臺

沙清江練繞城迴霜淨花枝拂檻開山閣晝閒宜對
酒病身秋盡始登臺瀟湘木落聞猿嘯彭蠡雲長見
鴈來郡僻漁樵堪卜隱時危戎馬轉興哀

東溪晴泛

鍾峽出秀浦碧潭無限清日浮江色動舟蹴浪花輕
盤石思垂釣滄浪愛濯纓沿洄意未極川暝月華明

江臯

金山堂集 卷二 五
巖溜湍湊雨風松浙瀝濤遠峰晴木暗清夏暑雲高
問節菖蒲近觀農稼穡勞微吟未歸去落日照江臯

郊行

沙路平如掌郊行吟望賒山圍四野碧河抱一村斜

孫曰句全似杜

松徑入僧寺草屋見漁家春風幾日到村園桃李花

洞靈觀

玉女已仙去仙丘尚此中龍吟山洞雨鶴舞石壇風
異代流傳久浮生夢覺同還尋煉丹處雲水夕陽空

東堂新成

種樹乘陰闢沼漁數椽聊此卜幽居諸峰稍識嵐霏

外三逕新鋤灌莽餘窮巷頗迴高士轍藜牀時讀古
人書欲因蘿薜辭簪弁慙愧承恩在玉除

無端世路遶羊腸偶以疎慵得自藏種竹旋添馴鶴
逕買山聊起讀書堂開窓古木蕭蕭籟隱几寒花寂
寂香莫笑野人生計少濯纓隨處有滄浪

賜告

春去復秋至愁多與病連屏居臣分淺賜告聖恩偏
闕望長迴首巖棲不記年時聞起桴鼓未暇枕書眠

晨起

枕畔聞啼鳥覺來春思閒行藥過石壁倚檻望雲山

館閣繆通籍林園深閉關殷勤謝知舊頻遣惜朱顏
春日

春日宜春睡夢醒時輾然處身無遠略憂世但長年
池濕青莎雨鶯啼綠樹烟近知理俗事學種南山田
讀易

徑轉頻移柳齋荒自補茅過從無俗客迂僻少深交
先雨鸛鳴垤知風鵲構巢行藏吾已任莫問易中文

感述

結茅楚水楓林下擁膝長吟任此身一官繫籍逢多
病數口攜家食舊貧谿圃秋深菊容淡石田春暖藥

苗新時危獻納思無術悵望中原傷戰塵

有喜致醉

三十年過方有子却論情事集悲歡總叨先德宜昌

語樸處再看愈好

後每為身愁欲廢官琴書他日期堪付堂構茲丘幸
苟完庭中翠竹紅葵色乘醉邀賓秉燭看

春曉歌

雞喞喞鼓逢逢晨暘熹春霧濛攬衣啓戶候晴色山
頭雲興轉深黑花潭柳嶼空復期躡屩攜壺難自得
瓦溝急雨鳴徹宵征人在途泥沒腰忽憶此時京國
侶策馬披氈趁早朝

夜讌歌

琉璃清蕙肴盈錦。鐙瑤席張四楹。華歌妙舞百伎呈。
夜行遊兮悅明星。奉君玉觴前致誠。上天垂休惠我。
明黃河之水。今再澄。天雞鳴海鳥升。願君舉觴且留。
情樂哉時乎方太平。
孫曰聲響全是古樂府而情緒婉約更感人楊曰似古白紵歌

乙亥年雪

燕京雪花大如手。寒洹江南未嘗有。近來江南雪亦
如燕京。前年豫章東抵鄱湖水。路氓爭傳耳共駭。故
老創見心猶驚。今年大雪連三日。陌上深踰二三尺。
葭管春回氣轉寒。柴門暮掃朝仍積。朝飛暮積無已

時四野濃雲一色垂。共道城中愁桂玉。虛從江畔覓
花枝。陰陽自古皆常度。物候今看却殊故。瞽史何由
訊咎徵。病夫默坐憂時事。
孫曰直欲以野朴之辭相勝感時傷事之體只須如是

霰

野霰朝仍集。山雲凍不收。家貧念藜藿。寒至想衣裘。
戎馬多征檄。江波有釣舟。短歌成獨醉。聊得坐消憂。

伐園中木

松柏儲棟梁。棗栗充豆籩。樗榆竟何益。歷歷蕃中園。
葉大苦蒙翳。材枉空攣跼。能令地脉耗。亦使陽和偏。

呼童礪斤斧爨燎供炊煙去莠植嘉穀斬茅秀蘭荃
栽培與傾覆在理固宜然不材世所棄剪伐何足憐

雨後南池

鳴雨夜不止春波漫綠塘細浪搖孤嶼廣岸映迴墻
乍宜添水檻還能受野航蒲荷紛擢秀槐柳儼成行
虛疑泛瀛島深擬對濠梁臨流興不極日暮歌滄浪

夏日閒居

卜築遠闌市虛堂近高林池塘新雨過夏木綠以陰
初日照前牖咿嚶語鳴禽聽之頗怡悅足慰靜者心
對雨

蒼靄起前壑白雨映中林曲池通爽氣高館足秋陰
陽日似戲却真把帙引眠思焚香清道心庭邊有老樹蕭瑟伴閒吟

秋夕閒居對雨

一雨洗炎囂高齋坐寂寥繁聲傍竹近寒色映空遙
頗襲圖書潤還霑枕席飄興幽忘盥櫛巷僻謝招要
蘭曉光逾碧荷秋葉互凋未須揮短筆涼意晚蕭蕭

楊曰通
篇淨瑩

郊園

柴扉在深木無人晝不關山圍修竹罅泉鳴亂石間
倚杖翫蒼翠臨風聽潺湲一瓢掛高樹日暮灌花還

金山堂集 卷之三
孫曰自然道實境
非強作者韻度

觀雨作

東峰雨色遶前溪野樹江船望欲迷
卷幔忽驚山霧入近村長聽水禽啼
清憐松菊長茅屋深愛湍流滿
稻畦故人門巷隔車轍多病青尊不可攜

齋中讀書

柳逕柴門闢向東竹垣高樹引清風
林中送客行常遠屋裏看山興不窮
唯須藥物供身病且愛閭閻屬
歲豐世事浮雲那足問此生拚老蠹魚叢

望鈴山

郭東草堂無俗囂畫屏靜對青岩堯
暮燈隔樹影明滅霜鍾吼空聲振搖
蓮秀虛疑太華出桂幽實愛小山
招為貪鶴背思千里擬接虹梯問九霄

觀馮式寶禹鈞事述詠

還妾當年不計貲一商陰德世難之
狀元已報神人送鄰里來談夢兆奇
定數難移豈信然但修人事可回天
寶郎夢得先靈告三紀延年五桂傳

月夕黎君見尋

蘭舟遠汎故情懽柳逕相邀月色寒
貧居市近能呼

金山堂集 卷之三
酒懶性人逢不整冠黃花醉可簪烏帽水檻閒宜弄
釣竿不是同心念幽獨碧山那得共君看

中丞劉公盧洲宴集公子與予姻也

東郭築堂好中丞載酒來盃長燒燭坐門正逐江開
瓊樹欣相倚霜威許見陪還知綠野醉真勝習池回

江館聞雨

江迥風連屋庭喧雨到牀寒聲雜松竹遠勢動瀟湘
幕燕翻應濕林花落盡香問音那有酒春棹易相將

楊曰有
風有韻

宿鴈洲

山登極嶺屹野適忽夷曠清澗屢寒涉綠疇彌晚望
水亭荷芰開園屋雲松傍應憐鴈洲宿絕勝剡溪訪

登高值雨留山舍

未遂觀竒願來過靜者居涉溪雲逐馬下榻雨鳴除
公子攜松醞鄉人饋鯉魚山寒春漏永莫遣綠尊虛
集劉大別業

別業春山裏松筠開翠微文觴坐群客此會昔應稀
澗雨桐花濕樓晴燕子飛主情殊未已乘醉出荆扉
喜友人至

下馬柴門日已曛燈前悲喜話同群空江歲晚無來

金山堂集 卷三詩
客遠道情深獨見君
瓦甕細傾山郭酒
藜牀閒臥石堂雲
莫言古調祇自愛
且誦新篇慰我聞

中秋陳大叅分司同楊太僕宴

涼夕逢秋半
仙盃坐漏長
未須延桂魄
卿月在薇堂

孫曰潤麗
有此者

秋夕東堂同傅館長兄宿

紙窓銀燭雨聲前
草屋寒栖共老仙
不覺對牀中夜語
青綾仍似玉堂年

鈴閣同劉子集咏

樹引有輿入山當對酒
吟泉流一壑響雲度數峰陰

茲地塵境絕逢君坐語深
誰言簪紱者同有薜蘿心
應和見尋

逶遲松桂林之子能相尋
遠道驚長別幽期感素心
楚臺臨月迴章水渡烟深
何物酬佳興風摠彈玉琴
將赴京作

七看梅發楚江濱
多難空餘一病身
闕下簡書催物役
鏡中癯貌愧冠紳
非才豈合仍求仕
薄祿深悲不逮親
此日滄浪理征棹
回瞻松栢自沾巾
孫曰感
愴曲折

將赴京登郡城春臺作

浮生奔走徧塵埃
重對鄉山病眼開
北望幾回仍赴

金山堂集 卷之三
闕南還今日始登臺
表江晴抱星辰下
燕鴈寒衝霧
雨來攀磴俯林堪
極目抽毫作賦歎
非才

登春臺貽錢別駕

府公地主催科劇
高閣看山引興來
三峽波濤深送
酒萬峯嵐翠迥
登臺黃花似與秋
期約塵世難逢笑
口開遺德古來韓
廟在爲尋荒碣斲
蒼苔

對雪贈客

江南素無此大雪
一夜覆地忽三尺
平明走覓江上
村不辨東阡與西
陌眼看世界入混
茫蔽野垂天同一
色訪舊虛迴剡曲
舟閉門正臥袁安
宅山中古樹

已開梅甕裏新醪
未潑醅祇應吟倚
湖邊棹何用歌
斟帳下盃

答符子

新題十幅寄鈴岡
白鴈西飛雲路長
因憶對牀孤燭
夜一簾松月照山
堂

鈴山堂集

卷二

七

鈴山堂集卷第二

